

## Taetas Nægkiariien sə rani mə nəfe i nəkukuə

Taetas in riti nəha Pol. Iasitu riti səvəi Pol. Nəp̄in nepw̄in in ramavən irau Pol. Nakalasia me fwe tənə əmweris riti kani mə Krit, Taetas in iəmə asori riti səvənraha. Nəkukuə i rəmwhen ia nəkukuə mi səvəi Timoti. Nakalasia me fwe Krit həpkukurən amasan mhə noien səvəi nəfwakiiən t̄i nəri nə mə irəha həpkuvehe vi a mhahatətə ia Kristo. Ro pen iərmama traməkeikei mevən masitu ia nirəha. Pol rini pen t̄i Taetas mine nakalasia me fwe ikin mə tuhəfarə irə. Pol rini pen t̄i Taetas mə trahatən irəha ia n̄ipərhiēnien. In rahatən mwi Taetas ia niriien nakalasia me.

### *Pol ramrai nəkukuə i m Taetas*

<sup>1</sup> Iou Pol, iou iərmama riti sə iakamo tukwini nari m Kumwesən, nənə iou aposol riti səvəi Iesu Kristo. In rərhi pen iou mə takasitu ia nərmama me səməme Kumwesən ruvər̄fi raka irəha. In rokeikei mə takasitu ia nirəha ia nahatətəien səvənraha, nənə masitu mwi ia nirəha mə tuhəukurən nəgkiariien pərhiēn sə ramahatən noien me Kumwesən rokeikei. <sup>2</sup> In rərhi pen iou mə takasitu ia nirəha pwəh həmri pen əknek̄in nətər̄igien səvənraha ia n̄im̄iruien rer̄in. Fwe tui, nəp̄in t̄iprənə ramiwən ihi, Kumwesən sə r̄ipkeikuə mhə ruvəni raka mə truvei pen n̄im̄iruien rer̄in nəha m̄inraha, <sup>3</sup> nənə ia nəp̄in atukwatukw

səvənhi in ro pui nīmīruien nəha ia nəgkiariien səvənhi. Kumwesən sə rauvehimīru kitaha rəmri pehe nəgkiariien nəha ia rəgik mīni nəkwān mə takəvisau irapw irə.

<sup>4</sup> Nəkukuə i rauvehe tukw ik Taetas. Ia nahatətəien səkrau ikəmwhen ia nərik pərhiēn. Pwəh Kumwesən Tata səkitaha mīne Iesu Kristo sə rauvehimīru kitaha trouəriari pehe namasanien mīne nəmərīnuien mik.

*Wok sə Taetas ramo ia tənə Krit*

<sup>5</sup> Iakinəpwəh ik ia tənə Krit mə tikəmri atukwatukw narimnari me səməme krau kripko mhə sampam irə. Rəmwhen iakiməni pehe tukw ik i, tikaməkeikei mevən ia rukwənu me pam muvehi utə elta me səvəi nəfwakiēn.

<sup>6</sup> Ikukurən nuvehi utəien iərmama riti trīni mīnuə noien səvənhi ratukwatukw pam, səvənhi pran kuatia, nīpwnətīn me kamhəni nīpərhiēnien ia Iesu, kīpkīni mhə irəha mə kənkəpwənraha riskai, uə həpwəh nisīaiēn tata mīne mama səvənraha.

<sup>7</sup> Iəmə asori sə ramətui tī nakalasia me ramo tukwini nari m Kumwesən, ro iamīnhi irə noien səvənhi traməkeikei matukwatukw pam. Rərəha mə kənkəpwə riskai, uə niemaha raməpi akwauakw in, uə ramənīmwi pīk, uə ramosi iərmama, uə ramo noien ikou mauvehi mane irə.

<sup>8</sup> Mətə iərmama sə rauvehi wok i traməkeikei mo iamīnhi irə: In raməsevər ia rukwənu səvənhi tī nərmama pwīspwīs me. In rokeikei noien amasan, nənə mukurən nari. In ramo noien atukwatukw mīne noien sə rəmher mo ikinan i. In ramatuakəm amasan. <sup>9</sup> In

---

**1:4:** 2Kor 8:23, Kal 2:3, 2Tim 1:2, 4:10, Rom 1:7    **1:6:** 1Tim 3:2-7, 2Tim 2:24-26    **1:7:** 1Kor 4:1    **1:9:** 2Tim 4:3, Taet 2:1

tramækeikei mækwætəmhiri æknekɪn nægkiariien pærhien sə kɪnəhatən in irə. Ia noien nəha in rukurən nasituien ia nərmama, mahatən irəha ia nægkiariien atukwatukw, mukurən mwɪ nəmri atukwatukwien nərmama səməme kəmhəni nægkiariien sə ropə ia nægkiariien nəha.

<sup>10</sup> Iakani iamɪnhi irə tɪ nəri nə mə nərmama həpɪk kənkapwənraha riskai. Irəha kəmhəni nægkiariien me nepwɪn nɪpwran riwən, mamheikuə ia nərmama. Pærhien nəkur Isrel me nepwɪn nəha irəha kəmhə iamɪnhi irə mhəpi raka nərmama me nepwɪn. Irəha kəmhəni mə tukamækeikei kuvehi ninhum m nərmama tɪ nahatən penien mə irəha nərmama me səvəi Kumwesən.

<sup>11</sup> Tikərapinhə rə ia nægkiariien səvənraha, tɪ nəri nə mə irəha kəmhəraha nərmama pəm ia nəkwai nimwə nepwɪn, mamhahatən nərmama ia nægkiariien sə rɪpkatukwatukw mhə mə tukahatən. Irəha kəmhə mə tuhəuvehi mane irə, mhəpwəh naurisien i.

<sup>12</sup> Iəmə Krit riti kupwən in profet riti səvənraha, in mwɪ rɪməni iamɪnhi mə, “Nəkur Krit irəha nərmama səvəi neikuəien ia nəpɪn me pəm. Irəha həmwhen ia nəri əprɪn me. Irəha rərpaha me. Nəpɪn me irəha hokeikei mə tuhamani a nari.”

<sup>13</sup> Nægkiariien səvəi profet nəha ro a nɪpərhienien. Ro iamɪnhi irə tikəkiari skai mɪnraha pwəh irəha həuvehe mhahatətə ia nægkiariien sə ratukwatukw, <sup>14</sup> mhəpwəh nesi penien kwənagei me səvəi nəkur Isrel mɪne natuakəmien me səvəi nərmama me səməme hənəpwəh nægkiariien

pərhien. <sup>15</sup> Nərmama səməme həmher ia nəmri Kumwesən nari riti riwən sə tro irəha həuvehe mhəmkemik. Mətə nərmama səməme həmkemik ia nəmri Kumwesən ti nəri nə mə həpwəh ninien nīpərhienien ia Iesu, nənə noien riti riwən sə tro irəha həmher. Ro iamɪnhi irə nətərigien səvənraha ramevən əpa ti nərəhaien, həreirei nəkiriien noien me. <sup>16</sup> Irəha həni mə həukurən Kumwesən, mətə noien səvənraha ramahatən pen mə rekəm irəha həreirei in. Nərmama me nəha hərəha anan, mamhərui nəkwai Kumwesən. Irəha ko həpko mhə nari amasan riti.

## 2

*Taetas traməkeikei mahatən nəgkiariien sə ratukwatukw*

<sup>1</sup> Mətə ik Taetas nəgkiariien səim traməkeikei mesi pen nəgkiariien kamahatən nərmama irə sə ratukwatukw. <sup>2</sup> Tikahatən nərgarə me mə rərəha irəha nərmama səvəi nənimwiien. Irəha tuhaməkeikei mhəukurən nari, pwəh nərmama həsiai irəha. Irəha tuhaməkeikei mamhahatətə pərhien, mamhokeikei nərmama, mamhərer əknekɪn ia nəpɪn me.

<sup>3</sup> Ia noien kuation a, tikahatən nīprənemə me mə irəha tuhaməkeikei mho noien sə ro ikinan i rəmwhen sə Kumwesən rokeikei. Rərəha mə irəha kamhəni nīkare nərmama, uə kamhənimwi pik nənimwien skai rəmwhen ia waen. Irəha tuhaməkeikei mhahatən nəgkiariien sə ramasan, <sup>4</sup> mamhəvəhag m nīpran me səməme harə vi a irəha nərman mə irəha tuhaməkeikei mhokeikei

səvənraha me nərman me mine nīpwnətīnraha me. <sup>5</sup> Irəha tuhaməkeikei mhəvəhag m nīpran me i mə irəha tuhəuvehe mho irəha nīpran me səməme həukurən nari, mhəmher, mamhətui amasan ti narimnari me fwe ia rukwənu, nənə mamhəsiai nərman me səvənraha. Nəpīn kamho noien sə ro iamīnhi, nənə, tuhərəpīnhə ia nərmana me mə tuhəpwəh nīni ərəhaien nəgkiariien səvəi Kumwesən.

<sup>6</sup> Ia noien kuatia a mwi, tikəgkiari amasan m ntəmaruə me mə irəha tuhaməkeikei mho narimnari me sə ramahatən pen mə irəha həukurən nari. <sup>7</sup> Nənə ik, ia narimnari me pam, tikamo a noien sə ramasan pwəh irəha hesi pen nəfe ikamo. Nəpīn tikahatən, nīmīruien səim traməkeikei matukwatukw mo nəgkiariien səim rīpam mo nərmana həsiai irə. <sup>8</sup> Tikaməkeikei mamīni a nəgkiariien pərhiēn mə nərmana tuhəpwəh nətoniēn təkutai nəgkiariien səim mhəni ərəha. Pwəh in tro nərmana səməme haməmwəki ik tuhauris tukwe ti nəri nə mə irəha həkətōni mhə noien ərəha riti səim, nənə, mhəpwəh nīni ərəhaien kitaha.

<sup>9</sup> Tikahatən slef me mə irəha tuhaməkeikei mho nəkwai nəmə asori me səvənraha ia narimnari me pam pwəh rerīnraha ragiēn ti wok səvənraha. Slef me tuhəpwəh nīniēn tai nəgkiariien səvəi nəmə asori me səvənraha, <sup>10</sup> nənə, mhəpwəh nakresien mīnraha. Mətə nəpīn me pam irəha tuhaməkeikei mho amasan nari pwəh nəmə asori me səvənraha tuhəni nīpərhiēniēn ia wok səvənraha. Noien me nəha tuho ia narimnari me pam rəmwhen mə

---

**2:5:** Efes 5:22      **2:7:** 1Tim 4:12, 1Tes 5:3      **2:8:** 1Tes 2:15  
**2:9:** 1Tim 6:1      **2:10:** Taet 1:3

kaməkwani pen tihinari me ia nəgkiariien səvəi Kumwesən, Kumwesən sə rauvehimiru kitaha.

<sup>11</sup> Krau kraukurən mə namasanien səvəi Kumwesən ruvəier pehe raka ti nərmama me pam. In nəha namasanien sə rauvehimiru nərmama irə. <sup>12</sup> Namasanien nəha raməvəhag m kitaha mə tsəni rekəm ia noien me səməme Kumwesən raməmwəki mine noien ərəha me səvəi tiprənə i nərmama hokeikei pik. Ia nitətə i ipwet mine kitaha tsaməkeikei mharə, mamhəukurən nari, mamho noien atukwatukw mine noien me səməme Kumwesən rokeikei, <sup>13</sup> nənə, mamhəfwini nəpən amasan nəha kitaha saməmri pen əknekən nətərigien səkitaha irə. Nəpən amasan nəha in nə nəpən sə Iesu Kristo trier pehe irə irau niskaiien səvənhi. Iesu nə in Kumwesən asori səkitaha rauvehimiru kitaha. <sup>14</sup> In rinəseni nimiruien səvənhi memhə tukutaha mə truvehi raka kitaha ia noien ərəha me pam, nənə, məpərhi kitaha səmher mhəuvehe mho kitaha nərmama səvənhi əpa səskai ti noien amasan me.

<sup>15</sup> Narimnari me i ik tikamahatən nərmama me irə. Tikuvehi utə nətərigien səvənraha, məgkiari minraha ti nəniseien noien ərəha me səvənraha. Ikauvehi nasoriien ti noien nəri i. Pwəh iərmama riti ripko mhə nəri auər a ia niram, məpwəh mwi nətəien təkutam.

### 3

*Noien amasan me səməme Taetas traməkeikei məvəhag m nakalasia me irə*

<sup>1</sup> Taetas. Tiko a pwəh rerinraha ramrhi mə

---

**2:12:** 1Jon 2:16, Efes 1:4    **2:13:** 1Kor 1:7, Fil 3:20    **2:14:** Kal 1:4, Eks 19:5, Dut 7:6, Sam 130:8, Esik 37:23, 1Tes 2:9    **2:15:** 1Tim 4:12    **3:1:** Rom 13:1-7, 1Tes 2:13-14

tuhəsiai nəmə asori me mine nərmama səməme kamhərimənu ia nirəha. Tuhaməkeikei mho nəkwənraha, nənə mhərer mwatuk ia nəpɪn me ti noien amasan me pam. <sup>2</sup> Irəha tuhəpwəh nini ərəhaien iərmama riti. Ia nəpɪn me tuhaməkeikei mharə ia nəmərinuien, mhəpwəh nəvisəien, nənə mheiwaiu mhasitu ia nərmama me pam.

<sup>3</sup> Irəha tuhaməkeikei mho iamɪnhi irə ti nəri nə mə fwe kupwən kitaha mwi səreirei nari, mamhəru i nəkwai Kumwesən. Kameikuə ia kitaha səpwəh nətəien suatuk atukwatukw. Noien ərəha me nepwɪn sokeikei pɪk mhəregi ramasan irə kamhərimənu ia kitaha. Ia narəien səkitaha samo pɪk nərəhaien. Reritaha ramakres narimnari me səvəi nərmama. Kaməmwəki kitaha nənə kitaha saməmwəki kitaha me. Fwe kupwən noien səkitaha ro iamɪnha irə, <sup>4</sup> mətə Kumwesən sə rauvei pehe nimiruien vi m kitaha rərhi pehe namasanien mine nokeikeiien səvənhi rier pehe tukutaha. <sup>5</sup> Ia nəpɪn nəha Kumwesən ruvehimiru kitaha. Mətə in rɪpkuvehimiru mhə kitaha ti nəri nə mə samo noien amasan me, rekəm. In ruvehimiru kitaha ti nəri nə mə rapi kitaha. In ruvehimiru kitaha nəpɪn Nənimwɪn Ikinan raikuas raka noien ərəha me səkitaha, sətui mwi, mhəuvehe mhərməvi mwi. <sup>6</sup> Kumwesən rətəgi irapw Nənimwɪn nəha ruvehe mukuər ia kitaha muku pen ti Iesu Kristo. Iesu nəha in iərmama sə rauvei pehe nimiruien vi m kitaha. <sup>7</sup> In rasitu ia kitaha ia namasanien səvənhi, mo kitaha satukwatukw ia nəmri Kumwesən mə

---

**3:2:** Fil 4:5    **3:3:** 1Kor 6:11, Efes 2:2, 5:8    **3:4:** Taet 1:3    **3:5:** 2Tim 1:9, Efes 5:26, Jon 3:5    **3:6:** Wok Me 2:17-18    **3:7:** Rom 3:24

kitaha tsəuvehi nimiruien rerin sə sənəmri pen əknekın raka nətərigien səkitaha irə. <sup>8</sup> Nəgkiariien i in nəgkiariien pərhiēn. Nənə iakokeikei mə tikahatən amasan nərmmama me ia narimnari me i. Pwəh nərmmama səməme həməni nıpərhiēnien ia Kumwesən tuhamarə mamho noien amasan me. Narimnari me i hamasan pik mamhasitu ia nərmmama.

<sup>9</sup> Mətə nəresien me nərmmama həreirei nari kəmhəni, mine nəgkiariien me kəmhəni ia kwənəkwas səvəi kaha kupwən me, mine nəvisəien me kəmhəvisə mınraha me ti nıpwrāi Loa səvəi Moses, tikaməkeikei mərer isipwın ti nırəha, ti nəri nə mə ko həpkasitu mhə, namasanien səvənraha riwən. <sup>10</sup> Trini mınuə iərmama riti rini nəgkiariien iamınhi meitehi kımiaha irə, tikevən mınise. Mə ro mwi iamınhi, nənə, tikevən mınise mwi. Trini mınuə ikınise m kəru, mətə raməkeikei ia noien səvənhi, nənə, tikərer pen isipwın tukwe, məpwəh. <sup>11</sup> Ikukurən mə iərmama sə ramo iamınhi irə, in iəmə rərəha, mamho noien ərəha. Noien səvənhi ramo pui atukw a in mə in iərmama riti Kumwesən trərpwın noien ərəha səvənhi.

### *Nəgkiariien sampam səvəi Pol*

<sup>12</sup> Takərhi pehe iərman mi i riti Atemas uə Tikikas truvehe mətoni ik. Nəpın truvehe irə, tikaməkeikei mətoni akwauakw a suatuk mə tikuvehe mətoni iou fwe taon nəha Nikopolis, ti nəri nə mə iou iakokeikei mə takevən marə fwe ikın ia nəpın səvəi nəkwieiiēn. <sup>13</sup> Iərmama mi

---

**3:9:** 2Tim 2:14,16,23    **3:10:** Mat 18:15-17, 2Jon 10    **3:11:**  
 1Tim 6:3-5    **3:12:** Efes 6:21-22    **3:13:** Wok Me 18:24, 1Kor  
 3:5-6, 1Kor 16:12



kəru nəghinrau nə Apolos mine Sinas, Sinas in iərmama riti sə ramowok ia nıkaren səvəi loa səvəi nəkur Rom, irau krauavən ia navənien səvənrau, mətə tikasitu ia nirau mə nari riti trəpwəh niwən tənien ia nirau. <sup>14</sup> Ramasan mə ikahatən nərmama me səkitaha mə irəha tuharə mamhəmwur mamho noien amasan me mamhasitu ia nərmama nepwın səməme narimnari me səvənraha ripkəmwhen mhə. Rərəha mə nərmama me səkitaha tuhamarə auər a.

<sup>15</sup> Nərmama me pam səməme kamharə kimaha minraha həni ramasan tukw ik. Nənə ik tikini tukwini ramasan səkimaha revən ti nərmama me səməme hokeikei kimaha mamhahatətə ia Iesu.

Pwəh namasanien tramarə tukumiaha pam.

**Nəkukuə Ikinan**  
**The New Testament in the Nafe (Kwamera) language**  
**of Southeast Tanna, TAFEA Province, Vanuatu**  
**Niutestamen long lanwis Nafe blong Vanuatu.**  
**Le Nouveau Testament dans la langue Nafe de**  
**Vanuatu.**

copyright © 2013 Wycliffe Bible Translators, Inc.

Language: Nafe (Nafe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

---

PDF generated using Haiola and XeLaTeX on 22 Feb 2024 from source files dated 31 Aug 2023

26b0f540-c192-5878-be67-18ede9ab1416